

Maria Angelina: PR tenki foti desizaun hanesan ba pakote lei FM

GMN TV 6 Agustu 2019



Prezidente Parlamentu Nasional Interina, Maria Angelina Sarmento, hatete, Prezidenti Repúblika (PR), Francisco Guterres Lú Olo, tenki foti desizaun veta ka promulga tenki hanesan ba lei 4 ne'ebé atu ajusta ba ratifikasiun Fronteira Marítima (FM), tanba pakote ida de'it.

“Lei 4 ne'e iha pakote ida de'it, ne'e duni labele veta rua, promulga rua fali la'e, ne'e iha pakote, ne'e duni kompetensia Prezidente Repúblika nian, sei veta, veta hotu, sei promulga, promulga hotu kendas, labele veta fali ida, ida lae, tanba lei sira ne'e iha interligasaun ba malu, maibé rua ne'e mak ita regula kona-ba fundu petrolíferu Timor-Leste nian, maibé rua seluk ne'e mak iha ligasaun forte ho kompetensia Estadu rua nian, no mós kompaña sira ne'ebé halo operasaun iha kampu Bayu Undan”, hateten Maria Angelina Sarmento ba jornalista sira iha PN, Segunda (05/08/2019) ne'e.

Maria Angelina hateten, asuntu ne'e, relasiona ho pedidu sosiedade sivil nian ne'ebé husu Xefe Estadu Francisco Guterres Lú Olo atu veta alterasaun lei fundu petrolíferu, husi lei 4 ne'ebé PN aprova no haruka ona ba PR, tanba konsidera, lei fundu petrolíferu ne'e, prejudika sustentabilidade ba fundu petrolíferu.

Maria Angelina esplika, lei fundu petrolíferu ho lei atividade petrolífera ne'e liga liu ba nessesidade internal TL nian, maibé lei rua seluk Tributária ho rejime laboral mak liga interesse Estadu rua nian.

Maibé 4 ne'ebé inkлина iha pakote ida, iha interligasaun ba malu.

“Lei fundu petrolíferu ho atividade petrolíferu ne'e liga ba nessesidade internal Timor-Leste (TL) nian, ne'e laiha implikasaun ba estadu seluk ninia partisipasaun iha FM ne'e, ne'e simplesmente ba Timor-Leste nia nessesidade de'it, iha implikasaun no iha ligasaun forte ho ratifikasiun tratadu FM ne'e, ne'ebé liga ho interesse Australia no kompaña sira nian mak lei rua ne'e, tributária ho rejime laboral”, tenik deputada ne'e.

Lejisladora ne'e subliña, bainhira Xefe Estadu veta ba pakote lei ne'e, maibé iha oportunidade daruak hafoin PN halo re-apresiasaun votus, PR labele veta tan no sei promulga.

“Polítikamente tenki simu nia konsekuensia, kuandu PR veta, maibé konstituisaun hateten katak, tenki haruka hikas mai PN, para hodi halo re-apresiasaun, iha re-apresiasaun ne'e, simplesmente rekere de'it maioria absoluta, 50% +1, husi deputadu sira ne'ebé efetividade funsoens, para halo re-apresiasaun, depois haruka fali ba PR, ne'e PR tenki promulga ona”, akresenta Primeira Vise PPN ne'e.

Pakote lejislasaun ne'e, PN aprova no haruka ona ba PR iha fulan Jullu ne'e.**say**